



საქართველოს პარლამენტის დადგენილება

2025–2027 წლების ფულად-საკრედიტო და სავალუტო
პოლიტიკის ძირითადი მიმართულებების შესახებ

„საქართველოს ეროვნული ბანკის შესახებ“ საქართველოს ორგანული კანონის
61-ე მუხლის მე-3 პუნქტის შესაბამისად

საქართველოს პარლამენტი ადგენს:

დამტკიცდეს საქართველოს ეროვნული ბანკის მიერ წარმოდგენილი 2025–2027
წლების ფულად-საკრედიტო და სავალუტო პოლიტიკის ძირითადი
მიმართულებები:

1. ინფლაციის მიზნობრივი მაჩვენებელი 2025–2027 წლებისთვის შეადგენს 3
პროცენტს.

2. საშუალოვადიან პერიოდში ინფლაციის მიზნობრივი მაჩვენებლის
შენარჩუნების მიზნით საქართველოს ეროვნული ბანკის მიერ 2025–2027 წლების
განმავლობაში ძირითადად გამოყენებული იქნება მონეტარული პოლიტიკის
განაკვეთი (რეფინანსირების განაკვეთი), რომლის ცვლილება ეკონომიკას გადაეცემა
მონეტარული პოლიტიკის შემდეგი ინსტრუმენტებით: რეფინანსირების სესხები,
ღია ბაზრის ერთთვიანი ინსტრუმენტი, მუდმივმოქმედი ინსტრუმენტები,
სადეპოზიტო სერტიფიკატები, მეორადი ბაზრის ოპერაციები მთავრობის ფასიანი
ქაღალდებით, სავალუტო ინტერვენციები, მინიმალური სარეზერვო მოთხოვნები და
სხვა ინსტრუმენტები.

3. 2025–2027 წლების განმავლობაში სამომხმარებლო ფასების მოსალოდნელ
დინამიკაზე გარეგანი ფაქტორებიდან მოქმედი შესაძლო რისკებია მსოფლიო
სასაქონლო ბაზრებზე ენერგორესურსების, ნედლეულისა და საკვები პროდუქტების
ფასების ცვლილება, გეოპოლიტიკური რისკების გამწვავება, რეგულირებადი
ფასების ცვლილება, განვითარებული ქვეყნების ცენტრალური ბანკების მიერ მკაცრი
პოლიტიკიდან მოსალოდნელზე ნელი ტემპით გამოსვლა და სხვა. საქართველოს

ეროვნული ბანკის მონეტარული პოლიტიკა არ მოახდენს რეაგირებას გარეგანი ფაქტორების შედეგად ინფლაციის მიზნობრივი მაჩვენებლიდან დროებითი გადახრისას, გარდა იმ შემთხვევისა, როდესაც გადახრა იმდენად ძლიერია, რომ გავლენას ახდენს ინფლაციაზე მოქმედ ფუნდამენტურ ფაქტორებზე.

4. ეს დადგენილება ამოქმედდეს გამოქვეყნებისთანავე.

საქართველოს პარლამენტის
თავმჯდომარე

თბილისი,
2024 წლის 10 დეკემბერი.
№48-IX-ს-ს-ს

მალვა პაპუაშვილი

